

**ՀԱՆՈՒՆ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆԻ  
Ո Ր Ո Շ Ո Ւ Մ Ը**

**2006 ԹՎԱԿԱՆԻ ՆՈՅԵՄԲԵՐԻ 28-ԻՆ ՄԻՆՄԿՈՒՄ ՍՏՈՐԱԳՐՎԱԾ՝ ԱՆԿԱԽ  
ՊԵՏՈՒԹՅՈՒՆՆԵՐԻ ՀԱՄԱԳՈՐԾԱԿՑՈՒԹՅԱՆ ՄԱՍՆԱԿԻՑ ՊԵՏՈՒԹՅՈՒՆ-  
ՆԵՐԻ ՀՈՒՄԱՆԻՏԱՐ ՀԱՄԱԳՈՐԾԱԿՑՈՒԹՅԱՆ ԽՈՐՀՐԴԻ ՄԱՍԻՆ ՀԱՄԱ-  
ՁԱՅՆԱԳՐՈՒՄ ԱՄՐԱԳՐՎԱԾ ՊԱՐՏԱՎՈՐՈՒԹՅՈՒՆՆԵՐԻ՝ ՀԱՅԱՍՏԱՆԻ  
ՀԱՆՐԱՊԵՏՈՒԹՅԱՆ ՍԱՀՄԱՆԱԴՐՈՒԹՅԱՆԸ ՀԱՄԱՊԱՏԱՍԽԱՆՈՒԹՅԱՆ  
ՀԱՐՑԸ ՈՐՈՇԵԼՈՒ ՎԵՐԱԲԵՐՅԱԼ ԳՈՐԾՈՎ**

Քաղ. Երևան

13 նոյեմբերի 2007թ.

Հայաստանի Հանրապետության սահմանադրական դատարանը՝ կազմով.  
Գ.Հարությունյանի (նախագահող), Կ. Բալայանի, Հ. Դանիելյանի, Ֆ. Թոխյանի, Զ.  
Ղուկասյանի, Հ. Նազարյանի (զեկուցող), Ռ. Պապայանի, Վ. Պողոսյանի,

համաձայն Հայաստանի Հանրապետության Սահմանադրության 100  
հոդվածի 2-րդ կետի, 101 հոդվածի 1-ին կետի, «Սահմանադրական դատարանի  
մասին» Հայաստանի Հանրապետության օրենքի 25, 38 և 72 հոդվածների,

դռնբաց նիստում գրավոր ընթացակարգով քննեց «2006 թվականի  
նոյեմբերի 28-ին Մինսկում ստորագրված՝ Անկախ պետությունների  
համագործակցության մասնակից պետությունների հումանիտար  
համագործակցության խորհրդի մասին համաձայնագրում ամրագրված  
պարտավորությունների՝ Հայաստանի Հանրապետության Սահմանադրությանը  
համապատասխանության հարցը որոշելու վերաբերյալ» գործը:

Գործի քննության առիթ է հանդիսացել Հանրապետության Նախագահի  
դիմումը սահմանադրական դատարան:

Ուսումնասիրելով սույն գործով զեկուցողի գրավոր հաղորդումը,  
Հանրապետության Նախագահի ներկայացուցիչ՝ ՀՀ արտաքին գործերի

նախարարի տեղակալ Գ. Ղարիբջանյանի գրավոր բացատրությունները, հետազոտելով համաձայնագիրը և գործում առկա մյուս փաստաթղթերը, Հայաստանի Հանրապետության սահմանադրական դատարանը **Պ Ա Ր Զ Ե Ց** .

1. Անկախ պետությունների համագործակցության մասնակից պետությունների հումանիտար համագործակցության խորհրդի մասին համաձայնագիրն ստորագրվել է 2006թ. նոյեմբերի 28-ին Մինսկում՝ Հայաստանի Հանրապետության, Բելառուսի Հանրապետության, Ադրբեջանի Հանրապետության, Ղազախստանի Հանրապետության, Ղրղզստանի Հանրապետության, Ռուսաստանի Դաշնության, Տաջիկստանի Հանրապետության, Ուզբեկստանի Հանրապետության կողմից:

Համաձայնագրի նպատակն է զարգացնել փոխադարձ հումանիտար համագործակցությունը: Այն կնքվել է 2005թ. օգոստոսի 26-ի՝ ԱՊՀ մասնակից պետությունների հումանիտար համագործակցության մասին համաձայնագրի հիման վրա /Հայաստանի Հանրապետության համար ուժի մեջ է մտել 2006թ. ապրիլի 17-ին/, որի 10-րդ հոդվածը նախատեսում է ստեղծել անկախ պետությունների համագործակցության մասնակից պետությունների հումանիտար համագործակցության խորհուրդ /այսուհետ՝ Խորհուրդ/՝ հումանիտար ոլորտում աշխատանքները համակարգելու նպատակով:

2. Խորհրդի գործունեությունը կարգավորվում է համաձայնագրի բաղկացուցիչ մասը հանդիսացող Կանոնադրությամբ:

Խորհրդի անդամներ են համաձայնագրի մասնակից պետությունների լիազոր ներկայացուցիչները՝ Խորհրդում հերթով մեկ տարի ժամկետով նախագահելու իրավունքով:

Խորհրդի հիմնական խնդիրներն են մշակույթի, կրթության, գիտության, արխիվային գործի, տեղեկատվության և զանգվածային հաղորդակցության, սպորտի, զբոսաշրջության և երիտասարդության հետ աշխատանքի բնագավառներում համագործակցության կատարելագործումը, զարգացումը և անհատի շնորհների ու ընդունակությունների իրագործման համար ներդաշնակ պայմանների ապահովումը:

Խորհուրդն իրականացնում է հետևյալ գործառույթները.

- համաձայնագրի մասնակից պետությունների հումանիտար համագործակցության հայեցակարգային և գործնական հարցերի քննարկում,

- հումանիտար ոլորտում համագործակցության առաջնային ուղղությունների և ձևերի որոշում, հումանիտար համագործակցության հիմնական ուղղություններով համատեղ գործողությունների համակարգման և փոխհամագործակցության ուղղությամբ առաջարկությունների մշակում,

- համաձայնագրի մասնակից պետությունների հումանիտար համագործակցության ոլորտում առաջնային միջպետական միջոցառումների երկամյա ծրագրերի նախապատրաստում,

- հումանիտար համագործակցության ոլորտում միջազգային իրավական փաստաթղթերի նախագծերի մշակում,

- համագործակցություն ՅՈՒՆԵՍԿՕ-ի և այլ միջազգային կազմակերպությունների հետ՝ համատեղ միջազգային ծրագրերի, նախագծերի ու միջոցառումների մշակման և իրականացման բնագավառներում,

- փոխհամագործակցություն Անկախ պետությունների համագործակցության մասնակից պետությունների հումանիտար համագործակցության միջպետական հիմնադրամի հետ.

- ԱՊՀ պետությունների ղեկավարների խորհրդի և կառավարությունների ղեկավարների խորհրդի նիստերին հումանիտար համագործակցության հետագա ամրապնդման և զարգացման մասին առաջարկությունների նախապատրաստում:

3. Խորհրդի մասին կանոնադրությամբ մանրամասնված են նաև այդ մարմնի աշխատանքների կազմակերպման կարգին ու ֆինանսավորմանը վերաբերող հարաբերությունները:

4. Համաձայնագրով Հայաստանի Հանրապետությունն ստանձնում է հետևյալ հիմնական պարտավորությունները.

- Խորհրդի իրավասության մեջ մտնող հարցերով վերջինիս տրամադրել տեղեկատվություն՝ այդպիսի պահանջի առկայության դեպքում,

- հոգալ Խորհրդի նիստերի անցկացման ծախսերը, եթե դրանք անցկացվում են ՀՀ տարածքում:

5. Համաձայնագրով Հայաստանի Հանրապետության ստանձնած պարտավորությունները բխում են միջազգային փոխշահավետ համագործակցության հաստատման վերաբերյալ ՀՀ Սահմանադրության 9 հոդվածում ամրագրված սկզբունքից:

Ելնելով գործի քննության արդյունքներից և ղեկավարվելով Հայաստանի Հանրապետության Սահմանադրության 100 հոդվածի 2-րդ կետով, 102 հոդվածի առաջին և չորրորդ մասերով, «Սահմանադրական դատարանի մասին» Հայաստանի Հանրապետության օրենքի 63, 64 և 72 հոդվածներով, Հայաստանի Հանրապետության սահմանադրական դատարանը **Ո Ր Ո Շ Ե Ց**.

1. 2006 թվականի նոյեմբերի 28-ին Մինսկում ստորագրված՝ Անկախ պետությունների համագործակցության մասնակից պետությունների հումանիտար համագործակցության խորհրդի մասին համաձայնագրում ամրագրված պարտավորությունները համապատասխանում են Հայաստանի Հանրապետության Սահմանադրությանը:

2. Հայաստանի Հանրապետության Սահմանադրության 102 հոդվածի երկրորդ մասի համաձայն սույն որոշումը վերջնական է և ուժի մեջ է մտնում հրապարակման պահից:

**ՆԱԽԱԳԱՀՈՂ**

**Գ. ՀԱՐՈՒԹՅՈՒՆՅԱՆ**

13 նոյեմբերի 2007 թվականի  
ՄԴՈ-717